

正氣歌

宋。文天祥

天地有正氣，雜然賦流形。下則為河嶽，
上則為日星。於人曰浩然，沛乎塞蒼冥。
皇路當清夷，含和吐明庭。時窮節乃見，
一一垂丹青。在齊太史簡，在晉董狐筆。
在秦張良椎，在漢蘇武節。為嚴將軍頭，
為嵇侍中血。為張睢陽齒，為顏常山舌。
或為遼東帽，清操厲冰雪。或為出師表，
鬼神泣壯烈。或為渡江楫，慷慨吞胡羯。
或為擊賊笏，逆豎頭破裂。是氣所磅礴，
凜烈萬古存。當其貫日月，生死安足論。
地維賴以立，天柱賴以尊。三綱實繫命，
道義為之根。嗟予遘陽九，隸也實不力。
楚囚纓其冠，傳車送窮北。鼎鑊甘如飴，
求之不可得。陰房闐鬼火，春院閤天黑。
牛驥同一皁，雞棲鳳凰食。一朝蒙霧露，
分作溝中瘠。如此再寒暑，百沴自辟易。
哀哉沮汝塲，為我安樂國。豈有他繆巧，
陰陽不能賊。顧此耿耿在，仰視浮雲白。
悠悠我心憂，蒼天曷有極。哲人日已遠，
典型在夙昔。風檐展書讀，古道照顏色。

歲次丙申年仲春

蔡榮林



敬書